

SOALAN NO.: 17

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : DATO' HENRY SUM AGONG [LAWAS]

TARIKH : 21 MAC 2016

SOALAN :

Dato' Henry Sum Agong [Lawas] minta **MENTERI PERUSAHAAN PERLADANGAN DAN KOMODITI** menyatakan apakah program bantuan dan inisiatif Kementerian bagi membantu golongan petani yang menghadapi masalah akibat penurunan harga komoditi seperti getah, kelapa sawit dan lain-lain.

JAWAPAN:

Tuan Yang Di-Pertua,

Untuk makluman Ahli Yang Berhormat, Kerajaan amat prihatin terhadap penurunan harga komoditi utama termasuk getah dan sawit, dan kesannya kepada pendapatan pekebun kecil. Dalam hal ini, Kerajaan telahpun melaksanakan beberapa langkah bagi membendung kesan penurunan harga getah dan sawit dan memastikan kebajikan para pekebun kecil terpelihara.

Dalam kes industri getah, Kerajaan telahpun melaksanakan Insentif Pengeluaran Getah (IPG) bermula 1 Januari 2015. IPG telah ditambah baik dengan menaikkan Paras Harga Pengaktifan (PHG) ke harga SMR20 RM5.50 sekilogram atau bagi *cuplump* RM2.20 sekilogram dari SMR20 RM5.10 sekilogram dan *cuplump* RM2.00 sekilogram mulai tahun 2016. Langkah ini akan membolehkan para pekebun kecil getah dengan pemilikan purata 2 hektar dan produktiviti *cuplump* sebanyak 3,000 kilogram sehektar setahun menikmati pendapatan bulanan sebanyak RM1,100 berbanding RM1,000 pada kadar lama. Bagi tujuan pelaksanaan IPG, Kerajaan telah menyediakan dana sebanyak RM200 juta.

Selain itu, lain-lain bantuan yang telah dilaksanakan bagi membantu pekebun kecil getah termasuk:

- (i) Menyediakan peruntukan sebanyak RM6.4 juta kepada koperasi sebagai modal pusingan untuk terlibat di dalam aktiviti urus niaga getah. Menerusi langkah ini, lapisan pembeli akan dapat dikurangkan dan seterusnya dapat meningkatkan harga pembelian getah di peringkat ladang. Berdasarkan maklum balas, sehingga kini sebanyak 18 koperasi sedang terlibat dalam urus niaga getah dan menawarkan harga secara purata RM0.10 sehingga RM0.20 sekilogram lebih tinggi berbanding harga yang ditawarkan pembeli getah berlesen; dan

- (ii) Menyediakan peruntukan sebanyak RM10 juta bagi penyediaan infrastruktur kutipan lateks dalam menggalakkan para pekebun kecil meningkatkan pengeluaran lateks. Ini adalah memandangkan harga lateks adalah lebih tinggi berbanding harga *cuplump*. Peruntukan ini akan digunakan untuk memperkukuhkan infrastruktur kutipan lateks. Melalui pendekatan ini, pekebun kecil dengan purata pegangan 2 hektar dan produktiviti lateks sebanyak 1,500 kilogram sehektar setahun dan harga getah pada SMR20 pada paras RM5.21 sekilogram akan dapat menikmati pendapatan bulanan sebanyak RM1,052.50.

Malaysia juga bekerjasama dengan lain-lain negara pengeluar getah asli termasuk di bawah kerangka *International Tripartite Rubber Council* (ITRC) yang juga melibatkan Thailand dan Indonesia. Negara-negara ITRC telah bersetuju untuk melaksanakan *Agreed Export Tonnage*

Scheme (AETS) yang keempat selama 6 bulan mulai bulan Mac hingga Ogos 2016. Di bawah mekanisme ini, ketiga-tiga negara akan menghadkan pengeksportan getah asli sebanyak 615,000 tan. Langkah ini dijangka akan dapat memperkukuhkan harga.

Tuan Yang Di-Pertua,

Bagi industri sawit, Kerajaan akan melaksanakan Skim Insentif Integrasi Tanaman dan Ternakan dengan Sawit mulai tahun 2016. Melalui skim ini, Kerajaan akan menyediakan:

- (i) insentif kepada pekebun kecil sawit persendirian untuk pelaksanaan integrasi tanaman dengan sawit. Ini meliputi pembelian input pertanian seperti benih tanaman, baja, racun, tiang sokongan dan penyediaan tanah;
- (ii) insentif integrasi ternakan dengan sawit dengan menyediakan lembu dan kambing, ubat-ubatan, peralatan dan kandang; dan
- (iii) latihan dan lawatan khidmat nasihat.

Selain itu, pelaksanaan skim tanam baru dan tanam semula sawit kepada pekebun kecil akan diteruskan. Di bawah skim ini, pekebun kecil persendirian yang mempunyai pemilikan tanah kurang dari 40 hektar akan menerima bantuan tanam semula berjumlah RM7,500 sehektar di Semenanjung Malaysia dan RM9,000 sehektar di Sabah dan Sarawak. Bantuan ini dihadkan kepada 5 hektar seorang. Bantuan

ini adalah bagi membantu pekebun kecil membiayai kos penyediaan tanah, bahan tanaman dan input pertanian.

Tuan Yang di-Pertua,

Kementerian Perusahaan Perladangan dan Komoditi akan terus melaksanakan langkah-langkah jangka pendek dan panjang ke arah menstabilkan harga komoditi getah dan sawit. Ini adalah untuk memastikan para pengusaha tanaman getah dan sawit terutamanya pekebun kecil meraih faedah daripada usaha mereka.

Sekian, terima kasih.